

**D.R. 7/2018**

**RANG UNDANG-UNDANG**

*b e r n a m a*

Suatu Akta untuk meminda Akta Pembangunan Sukan 1997.

[ ]

**DIPERBUAT** oleh Parlimen Malaysia seperti yang berikut:

**Tajuk ringkas dan permulaan kuat kuasa**

**1.** (1) Akta ini bolehlah dinamakan Akta Pembangunan Sukan (Pindaan) 2018.

(2) Akta ini mula berkuat kuasa pada tarikh yang ditetapkan oleh Menteri melalui pemberitahuan dalam *Warta*.

**Pindaan seksyen 2**

**2.** Akta Pembangunan Sukan 1997 [*Akta 576*], yang disebut “Akta ibu” dalam Akta ini, dipinda dalam seksyen 2—

(a) dalam takrif “badan sukan”, dengan menggantikan perkataan “, pertubuhan atau syarikat” dengan perkataan “atau pertubuhan”;

- (b) dengan memasukkan selepas takrif “badan sukan” takrif yang berikut:

‘ “Jawatankuasa Pertikaian Sukan” ertinya Jawatankuasa Pertikaian Sukan yang ditubuhkan di bawah Bahagian VI;’;

- (c) dengan memotong takrif “Panel Penasihat Sukan”; dan

- (d) dalam takrif “syarikat”, dengan menggantikan perkataan “Akta Syarikat 1965 [Akta 125]” dengan perkataan “Akta Syarikat 2016 [Akta 777]”.

### **Bahagian baharu IIIA**

3. Akta ibu dipinda dengan memasukkan selepas Bahagian III Bahagian yang berikut:

#### **“BAHAGIAN IIIA**

MAJLIS PARALIMPIK MALAYSIA DAN PERSATUAN  
SUKAN ORANG PEKAK MALAYSIA

#### **Majlis Paralimpik Malaysia**

**9A.** (1) Majlis Paralimpik Malaysia adalah diiktiraf sebagai Jawatankuasa Paralimpik Kebangsaan bagi Malaysia oleh Jawatankuasa Paralimpik Antarabangsa.

(2) Majlis Paralimpik Malaysia adalah bertanggungjawab untuk memastikan bahawa penyertaan Malaysia dalam Sukan Paralimpik, Sukan Paralimpik Asia dan pertandingan olahraga antarabangsa yang lain adalah mengikut kaedah-kaedah dan peraturan-peraturan Jawatankuasa Paralimpik Antarabangsa, Jawatankuasa Paralimpik Asia dan badan sukan antarabangsa yang lain yang Majlis Paralimpik Malaysia adalah anggota gabungannya.

### **Persatuan Sukan Orang Pekak Malaysia**

**9B.** (1) Persatuan Sukan Orang Pekak Malaysia adalah diiktiraf sebagai Persekutuan Sukan Orang Pekak Kebangsaan bagi Malaysia oleh Jawatankuasa Sukan Orang Pekak Antarabangsa.

(2) Persatuan Sukan Orang Pekak Malaysia adalah bertanggungjawab untuk memastikan bahawa penyertaan Malaysia dalam *Deaflympics*, Sukan Orang Pekak Asia Pasifik dan pertandingan olahraga antarabangsa yang lain adalah mengikut kaedah-kaedah dan peraturan-peraturan Jawatankuasa Sukan Orang Pekak Antarabangsa, Konfederasi Sukan Orang Pekak Asia Pasifik dan badan sukan antarabangsa yang lain yang Persatuan Sukan Orang Pekak Malaysia adalah anggota gabungannya.”.

### **Pindaan seksyen 11**

4. Subperenggan 11(1)(a)(i) Akta ibu dipinda dengan menggantikan perkataan “, pertubuhan atau syarikat” dengan perkataan “atau pertubuhan”.

### **Pindaan seksyen 12**

5. Subseksyen 12(2) Akta ibu dipinda dengan menggantikan perkataan “tidak melebihi lima ribu ringgit” dengan perkataan “tidak kurang daripada lima ribu ringgit tetapi tidak lebih daripada lima puluh ribu ringgit”.

### **Pindaan seksyen 20**

6. Seksyen 20 Akta ibu dipinda—

(a) dengan menggantikan subseksyen (1) dengan subseksyen yang berikut:

“(1) Pesuruhjaya hendaklah membatalkan pendaftaran sesuatu badan sukan jika Pesuruhjaya berpuas hati bahawa badan sukan itu—

(a) didaftarkan akibat daripada suatu fraud atau kesilapan atau salah nyataan dalam apa-apa butir-butir material; atau

- (b) tidak aktif atau bukan lagi entiti yang patut dan wajar didaftarkan untuk mewakili sukannya dalam mana-mana Negeri atau di Malaysia.”; dan
  
- (b) dengan memasukkan selepas subseksyen (1) subseksyen yang berikut:
 

“(1A) Pesuruhjaya boleh menggantung pendaftaran sesuatu badan sukan jika Pesuruhjaya berpuas hati bahawa badan sukan itu—

  - (a) tidak mematuhi apa-apa syarat yang dikenakan oleh Pesuruhjaya di bawah seksyen 18;
  - (b) melanggar mana-mana peraturan-peraturan yang dibuat di bawah Akta ini;
  - (c) tidak atau cuai untuk meremedikan apa-apa amalan salah, salah laku atau ketidakteraturan di pihak pemegang jawatannya atau anggotanya dalam tempoh yang ditentukan dalam notis bertulis yang diberikan oleh Pesuruhjaya;
  - (d) tidak bekerjasama atau menjadi penghalang dalam pelaksanaan peraturan-peraturan, dasar atau garis panduan yang dibuat di bawah atau menurut kuasa di bawah Akta ini; atau
  - (e) tidak atau cuai untuk menjalankan apa-apa aktiviti dan hal ehwal badan sukannya mengikut perlembagaannya.”.

### **Pindaan seksyen 21**

7. Seksyen 21 Akta ibu dipinda dengan memotong subseksyen (2).

### **Penggantian seksyen 24**

**8.** Akta ibu dipinda dengan menggantikan seksyen 24 dengan seksyen yang berikut:

#### **“Rujukan pertikaian kepada Jawatankuasa Pertikaian Sukan**

**24.** Jika sesuatu pertikaian tidak dapat diselesaikan mengikut tatacara dalaman yang disebut dalam seksyen 23, mana-mana anggota sesuatu badan sukan atau badan sukan itu sendiri boleh merujukkan pertikaian itu kepada Jawatankuasa Pertikaian Sukan untuk mendapatkan keputusan.”.

### **Seksyen baharu 24A**

**9.** Akta ibu dipinda dengan memasukkan selepas seksyen 24 seksyen yang berikut:

#### **“Rayuan terhadap keputusan Jawatankuasa Pertikaian Sukan**

**24A.** (1) Mana-mana anggota sesuatu badan sukan atau badan sukan yang terkilan dengan keputusan Jawatankuasa Pertikaian Sukan boleh, dalam masa dua puluh satu hari selepas keputusan itu disampaikan kepada anggota badan sukan atau badan sukan itu, merayu kepada Menteri.

(2) Menteri boleh mengesahkan, mengakaskan atau mengubah keputusan Jawatankuasa Pertikaian Sukan.

(3) Keputusan Menteri di bawah subseksyen (2) adalah muktamad.”.

### **Pindaan seksyen 25**

**10.** Subseksyen 25(2) Akta ibu dipinda dengan menggantikan perkataan “tidak melebihi lima ribu ringgit” dengan perkataan “tidak kurang daripada lima ribu ringgit tetapi tidak lebih daripada lima puluh ribu ringgit”.

## **Penggantian Bahagian VI**

**11.** Akta ibu dipinda dengan menggantikan Bahagian VI dengan Bahagian yang berikut:

**“BAHAGIAN VI**  
**JAWATANKUASA PERTIKAIAN SUKAN**

### **Penubuhan Jawatankuasa Pertikaian Sukan**

**27.** (1) Maka hendaklah ditubuhkan suatu jawatankuasa yang dikenali sebagai “Jawatankuasa Pertikaian Sukan” yang hendaklah mempunyai tanggungjawab untuk mendengar dan menyelesaikan pertikaian yang dirujuk kepadanya oleh mana-mana anggota sesuatu badan sukan atau badan sukan itu sendiri di bawah seksyen 24.

(2) Jawatankuasa Pertikaian Sukan hendaklah memastikan bahawa badan sukan dan pihak-pihak lain kepada pertikaian sukan termasuklah atlet diberikan cara yang berpatutan, adil dan pantas untuk menyelesaikan sesuatu pertikaian sukan.

### **Pelantikan anggota Jawatankuasa Pertikaian Sukan**

**28.** (1) Jawatankuasa Pertikaian Sukan hendaklah terdiri daripada anggota yang berikut yang hendaklah dilantik oleh Menteri:

(a) seorang Pengerusi;

(b) dua orang anggota yang, pada pendapat Menteri, mempunyai pengalaman, kelayakan atau menunjukkan keupayaan dan profesionalisme dalam perkara yang berhubungan dengan sukan, atau selainnya sesuai bagi pelantikan disebabkan oleh pengetahuan dan kemahiran khas mereka; dan

(c) dua orang anggota yang disifatkan patut oleh Menteri.

(2) Pengerusi dan anggota Jawatankuasa Pertikaian Sukan hendaklah memegang jawatan bagi suatu tempoh yang tidak melebihi dua tahun dan adalah layak untuk dilantik semula.

(3) Anggota Jawatankuasa Pertikaian Sukan hendaklah dibayar apa-apa saraan dan elaun yang ditentukan oleh Menteri setelah berunding dengan Menteri Kewangan.

(4) Jawatan seseorang anggota Jawatankuasa Pertikaian Sukan yang dilantik di bawah subseksyen (1) hendaklah menjadi kosong—

(a) jika dia mati;

(b) jika telah dibuktikan terhadapnya, atau dia telah disabitkan atas, suatu pertuduhan berkenaan dengan—

(i) suatu kesalahan yang melibatkan fraud, kecurangan atau keburukan akhlak;

(ii) suatu kesalahan di bawah mana-mana undang-undang yang berhubungan dengan rasuah; atau

(iii) apa-apa kesalahan lain yang boleh dihukum dengan pemenjaraan selama tempoh yang melebihi dua tahun;

(c) jika dia tidak sempurna akal atau selainnya tidak berupaya untuk menunaikan kewajipannya;

(d) jika dia tidak menghadiri persidangan Jawatankuasa Pertikaian Sukan tiga kali berturut-turut tanpa kebenaran Pengerusi atau dalam hal Pengerusi, tanpa kebenaran Menteri;

(e) jika peletakan jawatannya diterima oleh Menteri; atau

(f) jika pelantikannya dibatalkan oleh Menteri.

(5) Jika seseorang anggota yang dilantik di bawah subseksyen (1) terhenti menjadi anggota Jawatankuasa Pertikaian Sukan, Menteri boleh melantik seorang yang lain untuk mengisi kekosongan itu dan mana-mana orang yang dilantik sedemikian hendaklah memegang jawatan bagi baki tempoh itu.

(6) Pengerusi atau mana-mana anggota Jawatankuasa Pertikaian Sukan boleh meletakkan jawatannya pada bila-bila masa dengan memberikan notis secara bertulis kepada Menteri.

(7) Pada mana-mana prosiding Jawatankuasa Pertikaian Sukan, kuorum hendaklah terdiri tidak kurang daripada tiga orang anggota, termasuk Pengerusi, dan jika Pengerusi tiada, mana-mana anggota yang hadir pada prosiding itu boleh dilantik sebagai Pengerusi oleh anggota lain yang hadir.

**Setiausaha kepada Jawatankuasa Pertikaian Sukan dan pegawai lain**

**29.** (1) Menteri hendaklah melantik Pesuruhjaya untuk menjadi Setiausaha kepada Jawatankuasa Pertikaian Sukan.

(2) Menteri boleh menetapkan apa-apa bilangan pegawai awam sebagaimana yang difikirkan layak oleh Menteri untuk membantu Setiausaha.

(3) Bagi maksud Akta ini, Setiausaha dan pegawai yang ditetapkan di bawah subseksyen (2) hendaklah disifatkan sebagai pegawai Jawatankuasa Pertikaian Sukan.

**Kuasa Jawatankuasa Pertikaian Sukan untuk menghendaki pendedahan maklumat**

**30.** (1) Jawatankuasa Pertikaian Sukan boleh mengarahkan mana-mana orang supaya mendedahkan apa-apa maklumat kepada Jawatankuasa Pertikaian Sukan dan mengemukakan apa-apa laporan dan dokumen dalam pengetahuannya atau dalam milikannya sebagaimana yang difikirkan perlu bagi maksud penjalanan mana-mana kuasa dan fungsinya di bawah Akta ini dan Jawatankuasa Pertikaian Sukan boleh selanjutnya mengarahkan mana-mana orang yang Jawatankuasa Pertikaian Sukan difikirkan perlu supaya hadir di hadapannya untuk membolehkannya menjalankan tugas dan fungsinya di bawah Akta ini.

- (2) Mana-mana orang yang—
- (a) tidak mematuhi arahan Jawatankuasa Pertikaian Sukan di bawah subseksyen (1);
  - (b) mendedahkan apa-apa maklumat kepada Jawatankuasa Pertikaian Sukan yang diketahuinya adalah palsu; atau
  - (c) mengemukakan laporan atau dokumen kepada Jawatankuasa Pertikaian Sukan yang diketahuinya adalah palsu,

melakukan suatu kesalahan dan apabila disabitkan boleh didenda tidak kurang daripada lima ribu ringgit tetapi tidak lebih daripada lima puluh ribu ringgit atau dipenjarakan selama tempoh tidak melebihi lima tahun atau kedua-duanya.

### **Perlindungan daripada guaman dan prosiding undang-undang**

**31.** Tiada tindakan, guaman, pendakwaan atau apa-apa prosiding lain boleh diambil atau dibawa, dimulakan atau dikekalkan dalam mana-mana mahkamah terhadap anggota dan pegawai Jawatankuasa Pertikaian Sukan berkenaan dengan apa-apa tindakan, kecuaian atau keingkaran yang dilakukan atau ditinggalkan daripada dilakukan atau dibuat oleh anggota dan pegawai Jawatankuasa Pertikaian Sukan jika tindakan, kecuaian atau keingkaran itu dilakukan atau ditinggalkan atau dibuat, dengan suci hati.

### **Peraturan-peraturan berkenaan dengan Jawatankuasa Pertikaian Sukan**

**32.** Menteri boleh membuat peraturan-peraturan sebagaimana yang perlu berkenaan dengan Jawatankuasa Pertikaian Sukan dan khususnya dan tanpa menjelaskan keluasan makna yang terdahulu, Menteri boleh membuat peraturan-peraturan berkenaan dengan yang berikut:

- (a) menetapkan tatacara yang hendaklah dipakai oleh Jawatankuasa Pertikaian Sukan dalam menguruskan apa-apa pertikaian yang dirujukkan kepadanya di bawah seksyen 24; dan

- (b) secara amnya bagi penjalanan yang lebih baik fungsi Jawatankuasa Pertikaian Sukan di bawah Akta ini.”.

### **Pindaan seksyen 33**

**12.** Seksyen 33 Akta ibu dipinda—

- (a) dengan menomborkan semula seksyen yang sedia ada sebagai subseksyen (1);
  - (b) dalam subseksyen (1) yang dinomborkan semula, dengan memasukkan selepas perkataan “tawaran” perkataan “atau menawarkan diri”; dan
  - (c) dengan memasukkan selepas subseksyen (1) yang dinomborkan semula subseksyen yang berikut:
- “(2) Mana-mana orang yang melanggar subseksyen (1) melakukan suatu kesalahan dan apabila disabitkan boleh didenda tidak kurang daripada lima puluh ribu ringgit tetapi tidak lebih daripada lima ratus ribu ringgit atau dipenjarakan selama tempoh tidak melebihi lima tahun atau kedua-duanya.”.

### **Pindaan seksyen 36**

**13.** Seksyen 36 Akta ibu dipinda dengan memasukkan selepas subseksyen (3) subseksyen yang berikut:

“(4) Mana-mana syarikat yang melanggar subseksyen (1) melakukan suatu kesalahan dan apabila disabitkan boleh didenda tidak kurang daripada lima puluh ribu ringgit tetapi tidak lebih daripada lima ratus ribu ringgit atau dipenjarakan selama tempoh tidak melebihi lima tahun atau kedua-duanya.

(5) Jika suatu kesalahan di bawah seksyen ini telah dilakukan oleh suatu syarikat, mana-mana orang yang pada masa pelakuan kesalahan itu ialah seorang pengarah, ketua pegawai eksekutif, ketua pegawai operasi, pengurus, setiausaha atau pegawai serupa

lain bagi syarikat itu atau yang berupa bertindak atas mana-mana sifat sedemikian atau yang dengan apa-apa cara atau pada apa-apa takat bertanggungjawab bagi pengurusan apa-apa hal ehwal syarikat itu atau yang membantu dalam pengurusannya—

- (a) boleh dipertuduh secara berasingan atau bersesama dalam prosiding yang sama bersekali dengan syarikat itu; dan
- (b) jika syarikat itu didapati telah melakukan kesalahan itu, hendaklah disifatkan telah melakukan kesalahan itu melainkan jika, dengan mengambil kira jenis fungsinya atas sifat itu dan segala hal keadaan, dia membuktikan—
  - (i) bahawa kesalahan itu telah dilakukan tanpa pengetahuan, persetujuan atau pembiarannya; dan
  - (ii) bahawa dia telah mengambil segala langkah yang munasabah dan menjalankan segala usaha yang wajar untuk menghalang pelakuan kesalahan itu.”.

### **Pindaan seksyen 38**

**14.** Subseksyen 38(3) Akta ibu dipinda dengan menggantikan perkataan “tidak melebihi lima ribu ringgit atau tempoh pemenjaraan tidak melebihi enam bulan” dengan perkataan “tidak kurang daripada lima ribu ringgit tetapi tidak lebih daripada lima puluh ribu ringgit atau tempoh pemenjaraan tidak melebihi lima tahun”.

### **Pemotongan seksyen 39**

**15.** Akta ibu dipinda dengan memotong seksyen 39.

### **Peruntukan kecualian dan peralihan**

**16.** (1) Apa-apa pendaftaran sesuatu syarikat yang didaftarkan sebagai suatu badan sukan di bawah Akta ibu sebelum tarikh permulaan kuat kuasa Akta ini, hendaklah disifatkan sebagai

dibatalkan pada tarikh permulaan kuat kuasa Akta ini dan hendaklah terhenti diuruskan di bawah peruntukan Akta ibu sebagaimana yang dipinda oleh Akta ini.

(2) Apa-apa tindakan yang dimulakan atau belum selesai sebelum tarikh permulaan kuat kuasa Akta ini hendaklah, selepas tarikh permulaan kuat kuasa Akta ini, diteruskan seolah-olah Akta ibu tidak dipinda oleh Akta ini.

(3) Apa-apa obligasi atau liabiliti yang terakru atau dikenakan di bawah Akta ibu, boleh diteruskan, dikuatkuasakan, dikenakan dan diuruskan, mengikut mana-mana yang berkenaan, seolah-olah Akta ibu tidak dipinda oleh Akta ini.

#### HURAIAN

Rang Undang-Undang ini bertujuan untuk meminda Akta Pembangunan Sukan 1997 (“Akta 576”).

2. *Fasal 1* mengandungi tajuk ringkas dan peruntukan mengenai permulaan kuat kuasa Akta yang dicadangkan.

3. *Fasal 2* bertujuan untuk meminda seksyen 2 Akta 576 dengan memasukkan takrif baharu “Jawatankuasa Pertikaian Sukan” ke dalam Akta 576 dan untuk meminda takrif yang sedia ada.

4. *Fasal 3* bertujuan untuk memasukkan Bahagian baharu IIIA ke dalam Akta 576 untuk mengadakan peruntukan yang berhubungan dengan badan sukan iaitu Majlis Paralimpik Malaysia dan Persatuan Sukan Orang Pekak Malaysia yang masing-masingnya diiktiraf oleh Jawatankuasa Paralimpik Antarabangsa dan Jawatankuasa Sukan Orang Pekak Antarabangsa.

Bahagian baharu IIIA yang dicadangkan bertujuan untuk mengadakan peruntukan bahawa Majlis Paralimpik Malaysia bertanggungjawab untuk memastikan penyertaan Malaysia dalam Sukan Paralimpik, Sukan Paralimpik Asia dan pertandingan olahraga antarabangsa yang lain.

Bahagian baharu IIIA yang dicadangkan juga bertujuan untuk mengadakan peruntukan bahawa Persatuan Sukan Orang Pekak Malaysia bertanggungjawab untuk memastikan penyertaan Malaysia dalam *Deaflympics*, Sukan Orang Pekak Asia Pasifik dan pertandingan olahraga antarabangsa yang lain.

5. *Fasal 4* bertujuan untuk meminda seksyen 11 Akta 576 berdasarkan suatu dasar bahawa syarikat tidak lagi dibenarkan untuk didaftarkan sebagai suatu badan sukan di bawah Akta 576.

6. *Fasal 5* bertujuan untuk meminda seksyen 12 Akta 576 untuk menaikkan penalti bagi kesalahan tidak mematuhi arahan Pesuruhjaya, mendedahkan maklumat palsu atau mengemukakan laporan palsu daripada denda sedia ada iaitu tidak melebihi lima ribu ringgit kepada denda yang dicadangkan tidak kurang daripada lima ribu ringgit tetapi tidak lebih daripada lima puluh ribu ringgit.

7. *Fasal 6* bertujuan untuk meminda seksyen 20 Akta 576 dengan membezakan alasan untuk membatalkan atau menggantung pendaftaran sesuatu badan sukan. Dengan pindaan yang dicadangkan alasan pembatalan atau penggantungan yang sedia ada dibezakan bagi membolehkan Pesuruhjaya melaksanakan pembatalan atau penggantungan dengan cekap.

8. *Fasal 7* bertujuan untuk meminda seksyen 21 Akta 576 berbangkit daripada pemasukan Jawatankuasa Pertikaian Sukan di bawah Bahagian VI.

9. *Fasal 8* bertujuan untuk meminda seksyen 24 Akta 576 untuk membolehkan mana-mana anggota sesuatu badan sukan atau badan sukan itu sendiri untuk merujukkan apa-apa pertikaian yang tidak dapat diselesaikan mengikut tatacara dalaman kepada Jawatankuasa Pertikaian Sukan dan bukannya kepada Menteri.

10. *Fasal 9* bertujuan untuk memasukkan seksyen baharu 24A ke dalam Akta 576 yang memberi Menteri kuasa untuk mendengar rayuan daripada mana-mana anggota sesuatu badan sukan atau badan sukan itu sendiri yang terkilan dengan keputusan Jawatankuasa Pertikaian Sukan.

11. *Fasal 10* bertujuan untuk meminda subseksyen 25(2) untuk menaikkan penalti bagi apa-apa pelanggaran di bawah subseksyen 25(1) daripada denda sedia ada iaitu tidak melebihi lima ribu ringgit kepada denda yang dicadangkan iaitu tidak kurang daripada lima ribu ringgit tetapi tidak lebih daripada lima puluh ribu ringgit.

12. *Fasal 11* bertujuan untuk menggantikan Bahagian VI Akta 576 untuk mengadakan peruntukan yang berhubungan dengan Jawatankuasa Pertikaian Sukan (“Jawatankuasa”) yang menggantikan Panel Penasihat Sukan yang sedia ada. Cadangan pindaan kepada Bahagian VI adalah berikut dengan pindaan kepada seksyen 24 Akta 576 yang, dengan cadangan pindaan tersebut mana-mana anggota sesuatu badan sukan atau badan sukan itu sendiri boleh merujuk kepada Jawatankuasa untuk mendapatkan keputusan terhadap apa-apa pertikaian sukan.

Seksyen 27 yang dicadangkan bertujuan untuk mengadakan peruntukan bagi penubuhan Jawatankuasa untuk mendengar dan menyelesaikan apa-apa pertikaian sukan yang dirujukkan kepadanya oleh mana-mana anggota sesuatu badan sukan atau badan sukan itu sendiri.

Seksyen 28 yang dicadangkan bertujuan untuk mengadakan peruntukan bagi keanggotaan Jawatankuasa dan perkara yang berhubungan dengan keanggotaan Jawatankuasa.

Seksyen 29 yang dicadangkan bertujuan untuk memberi Menteri kuasa untuk melantik Pesuruhjaya Sukan untuk menjadi Setiausaha kepada Jawatankuasa dan pegawai lain untuk membantu Setiausaha.

Seksyen 30 yang dicadangkan bertujuan untuk memberi Jawatankuasa kuasa untuk menghendaki pendedahan maklumat, laporan atau dokumen daripada mana-mana orang dan kehadiran mana-mana orang di hadapan Jawatankuasa bagi membolehkan Jawatankuasa menjalankan tugas dan fungsinya dengan lebih baik untuk mendengar dan menyelesaikan apa-apa pertikaian sukan yang dirujukkan kepadanya.

Seksyen 31 yang dicadangkan bertujuan untuk melindungi anggota dan pegawai Jawatankuasa terhadap guaman dan prosiding undang-undang bagi apa-apa tindakan yang dilakukan atau ditinggalkan daripada dilakukan dengan suci hati semasa menjalankan tugas dan fungsi mereka di bawah Akta 576.

Seksyen 32 yang dicadangkan bertujuan untuk memberi Menteri kuasa untuk membuat peraturan-peraturan yang berhubungan dengan Jawatankuasa.

13. *Fasal 12* bertujuan untuk meminda seksyen 33 Akta 576 bagi mewajibkan mana-mana orang yang menawarkan diri untuk menjadi tuan rumah bagi apa-apa pertandingan antarabangsa atau acara sukan antarabangsa di Malaysia untuk mendapatkan kelulusan secara bertulis Menteri terlebih dahulu. Pada masa ini, hanya orang yang membuat tawaran untuk menjadi tuan rumah bagi apa-apa pertandingan sukan antarabangsa atau acara sukan antarabangsa di Malaysia dikehendaki untuk mendapatkan kelulusan secara bertulis Menteri terlebih dahulu. *Fasal 12* juga bertujuan untuk mengadakan peruntukan bagi penalti atas kegagalan mendapatkan kelulusan.

14. *Fasal 13* bertujuan untuk meminda seksyen 36 Akta 576 untuk menjadikannya suatu kesalahan bagi mana-mana syarikat yang melanggar subseksyen 36(1) Akta 576. Pindaan ini dicadangkan kerana kesalahan tidak diperuntukkan di bawah seksyen 36 sedia ada Akta 576 bagi mereka yang melanggar subseksyen 36(1) Akta 576. Dengan kejadian aktiviti sukan di Klang baru-baru ini yang dianjurkan oleh suatu syarikat tanpa mendapatkan lesen di bawah subseksyen 36(1) Akta 576 yang telah menyebabkan kematian seorang peserta dan kecederaan ramai peserta, syarikat itu tidak boleh dipertuduh di bawah Akta 576 kerana suatu kesalahan tidak diperuntukkan di bawah seksyen 36 sedia ada Akta 576.

15. *Fasal 14* bertujuan untuk meminda subseksyen 38(3) Akta 576 untuk menaikkan penalti bagi apa-apa kesalahan kepada mana-mana peraturan-peraturan yang dibuat di bawah seksyen 38 dan seksyen 26 Akta 576 daripada denda sedia ada iaitu tidak melebihi lima ribu ringgit atau tempoh pemenjaraan tidak melebihi enam bulan kepada denda yang dicadangkan iaitu tidak kurang daripada lima ribu ringgit tetapi tidak lebih daripada lima puluh ribu ringgit atau tempoh pemenjaraan tidak melebihi lima tahun.

16. *Fasal 15* bertujuan untuk memotong seksyen 39 Akta 576 berhubung dengan kesalahan-kesalahan am berbangkit daripada pindaan kepada seksyen 31, 33 dan 36 yang penalti bagi kesalahan itu dicadangkan supaya diperuntukkan dalam seksyen 31, 33 dan 36. Seksyen 39 Akta 576 dipotong kerana peruntukan bagi kesalahan-kesalahan am tidak lagi relevan.

17. *Fasal 16* bertujuan untuk mengadakan peruntukan kecualian dan peralihan.

*IMPLIKASI KEWANGAN*

Rang Undang-Undang ini akan melibatkan Kerajaan dalam perbelanjaan wang tambahan yang amanannya belum dapat ditentukan pada masa ini.

[PN(U2)3105]